

պետք նորա, զորս սպան և զորս աքսորեաց ի Մըսրը: Եւ սպան զքէհա պէկ Մուստաֆայ աղայ, զեհնկիչէր աղասի Ղարա Զաւուշ, զՊէքտաշ աղայ, զՏէլի Պրատէր խարաճչի, զՍարի Քեաթիպ թէզքէրէճի, զայսոսիկ մի մի գտեալ ի թաքստեան տեղւոջ և յայտնապէս ոչնչացոյց, և զայլս ի ծածուկ, որք մեզ չեն յայտնի. և եզ եհնկիչէր աղասի զՂարա Հասանօղլի զոմն Հիւսէին աղա: Եւ ոչ զագարէր, և կամէր միւսանգամ ևս մեծամեծաց մինչև ցփոքունս ի ներքինեաց սեւաւոցն, սենեկապետացն և նախարարացն արքունի որ ի պալատն՝ փոփոխել, զոմանս սպանանել եւ զոմանս աքսորել, որպէս արար նախ: Այլ նոքա փութացան և վալիտէն ևս կամէր արձակել զոտքն, տեսեալ զհամարձակութիւն սորա՝ երկեաւ եւ նախարարօքն դրդեցին և ուսուցին թագաւորին, զի կոչեալ առ ինքն զՍիա[ւուշ], առեալ ի նմանէ զկնիքն՝ տայ Կիւրճի Մէհմէտ փաշային՝ վէզիրութեան: Եւ Կիւրճին եղեալ զՍիաւուշն ի բերդ և առնէ բազում քսակս ի նմանէ և աքսորեաց ի Մալղարայ՝ թէ ի Ղանլիճայ: Այս եղև Հոկտեմբեր ամսոյ ԺԸ, որ Կէ օր կացաւ վէզիր Սիաւուշն:

Յաւուրս սորա մէտրապօլիտն Սախըզոյ Յունաց կայր աստ և էր յոյժ փառասէր և մարմնասէր կարի և անհնազանդ պատրիարքին: Յաւուր միում դանակս քարչեալ ի վերայ նորա թէ Դու ո՞վ ես որ հնազանդիմ քեզ. ահա՛ ես եմ պատրիարք: Եւ մտեալ ի նայ սատանայ, որ ոչ կարէր լինել պատրիարք, ուրացաւ զՔրիստոս. և Տաճիկք ի մեծ խնդութենէ իւրեանց՝ նախարարք վէզիրին մեծացուցեալ արարին զափուճի պաշի թագաւորին, որ էառ զտուն և զկին փաշային Փիալէի սատակելոյ, որ և ընդ նմին դասեցի և նա ի տարտարոսն յաւիտենից, յորմէ փրկեսցէ զմեզ Քրիստոս: